

Broj: 01-37-154/09  
Sarajevo, 08.01.2009.g.

## CENTAR ISTRAŽIVAČKOG NOVINARSTVA

### SARAJEVO

**Predmet:** Dostava podataka

Poštovani,

U vezi vašeg upita o isplaćenim naknadama članovima komisija, formiranim u Federalnom ministarstvu zdravstva, izvještavamo vas da zbog obimnosti materijala i intenzivnijih tekućih poslova u ovom periodu, nismo uspjeli blagovremeno dostaviti tražene podatke. Naime, ukupna popunjenost kadrovima u ovom ministarstvu, u odnosu na Pravilnik o unutrašnjoj organizaciji, je ispod 50%, a u Sektoru za finansije i zdravstveno osiguranje (nadležnom za dostavu navedenih podataka) od sistematiziranih 10 radnih mjesta, uposlena su samo tri izvršioca. Napominjemo da se radi o obimnijem materijalu, jer se formira veći broj pojedinačnih komisija, a isplata se vrši posebno po svakoj održanoj sjednici komisije.

Saglasno važećim propisima, a u okviru nadležnosti ovog ministarstva, obrazuju se razne komisije i radna tijela, i to:

- **Komisija za polaganje stručnih ispita zdravstvenih radnika:**

U ovom segmentu obrazuju se posebne komisije za polaganje stručnog ispita slijedećih zdravstvenih radnika: doktora medicine, doktora stomatologije, magistara farmacije, diplomiranih medicinskih radiologa, diplomiranih medicinskih sestara, diplomiranih fizioterapeuta, diplomiranih inženjera medicinske radiologije, diplomiranih inženjera laboratorijske dijagnostike i diplomiranih sanitarnih inženjera. Primjera radi, u 2007. godinu održano je 28 ispitnih komisija, kojima je pristupilo 442 kandidata. U 2008. godini održane su 34 ispitne komisije, naknada je izvršena za 204 člana komisije, a ispitima je pristupilo 535 kandidata.

- **Komisija za polaganje specijalističkih ispita zdravstvenih radnika:**

Za polaganje specijalističkog ispita za svakog kandidata se imenuje posebna komisija od tri člana, kao i sekretar komisije. U 2007. godini po ovom osnovu naknada je isplaćena za 118 lica.

- **Komisija za lijekove:**

Ovo ministarstvo imenuje posebnu komisiju, koja obavlja poslove u vezi stavljanja lijeka u promet. Tako je u 2007. godini održano 11 sastanaka navedene komisije, a isplata je izvršena za 19 članova komisije.

- **Federalna etička komisija:**

Saglasno važećim propisima utemeljena je Federalna etička komisija sa zadatkom da odobrava i nadzire klinička ispitivanja lijekova i drugih medicinskih sredstava. Po ovom osnovu u 2007. godinu naknadu je isplaćena za 16 osoba, a izvršena su klinička ispitivanja za tri lijeka.

- **Komisija za dodatke prehrani i za kozmetiku s posebnom namjenom:**

Ova komisija se bavi ispitivanjem uvjeta za izdavanje dozvola za uvoz i/ili stavljanje u promet dijetetskih namirnica i drugih pripravaka, kao i biljnih pripravaka koji se koriste za kozmetiku s posebnom namjenom. Primjera radi, u 2007. godini je održano 5 takvih sjednica komisija, a naknada je izvršena za 7 članova komisija. Naknada se isplaćuje posebno po svakoj održanoj sjednici.

- **Komisija za medicinska pomagala:**

U 2008. godini formirana je Komisija za medicinska pomagala, koja je nadležna za poslove u vezi sa prijavom i upisom medicinskih pomagala u Registar medicinskih pomagala, a održano je 6 sjednica, te naknada isplaćena za 13 članova Komisije. Naknada se vrši posebno po svakoj održanoj sjednici.

- **Komisije za ocjenu ispunjenosti uvjeta prostora, opreme i kadra za obavljanje djelatnosti koje spadaju u nadležnost Federalnog ministarstva zdravstva:**

U okviru svoje nadležnosti; Federalno ministarstvo zdravstva izdaje odobrenja o ispunjenosti uvjeta prostora opreme i kadra za obavljanje slijedećih djelatnosti: veleprometnika lijekova i carinskog skladišta, za proizvođača medicinskih pomagala, za velepromet medicinskih pomagala, za obavljanje djelatnosti prometa otrova, za obavljanje djelatnosti dezinfekcije, dezinfekcije i deratizacije, za izdavanje odobrenja za rad proizvođača lijekova, za usaglašenost glavnog izvedbenog postupka proizvođača lijekova sa propisima o dobrim praksama, za ocjenu ispunjenosti uvjeta za stručne institucije koje se bave ispitivanjem lijekova, za ispunjenost minimalnih higijensko-tehničkih, sanitarnih i tehnološko-tehničkih uvjeta na mjestu proizvodnje kozmetike s posebnom namjenom, za ispunjenost minimalnih higijensko-tehničkih, sanitarnih i tehnološko-tehničkih uvjeta na mjestu proizvodnje dijetetskih proizvoda. Takvih komisija je u 2008. godini bilo 54, a naknada je izvršena za 162 člana komisija.

Za angažiranje navedenih komisija podnosioci zahtjeva uplaćuju naknadu na Jedinstveni račun Trezora Federacije Bosne i Hercegovine, od čega se izmiruju troškovi rada članova komisije, a dio sredstava ostaje kao prihod Budžeta Federacije BiH.

Pored navedenih komisija, gdje se ostvaruje prihod u Budžet Federacije BiH, formiraju se i isplaćuju naknade članovima radnih tijela, obrazovanim u ovisnosti od intenziteta raznih poslova i zadataka, a u tekućoj godini radi se o slijedećim komisijama i radnim tijelima:

- Komisija za primjenu, provođenje i tumačenje odredbi Kolektivnog ugovora o pravima i obavezama poslodavaca i zaposlenika u oblasti zdravstva na teritoriji Federacije BiH,
- Radna grupa za reviziju Liste esencijalnih lijekova,
- Radna grupa za izradu šeste revizije Liste esencijalnih lijekova
- Komisija za prevencije i kontrolu malignih oboljenja u Federaciji BiH,
- Tim za razvoj programa i primjenu DRG sistema u Federaciji BiH,
- Radna grupa za izradu stručnih osnova Pravilnika o specijalizacijama, kao i plana i programa specijalizacija i subspecijalizacija zdravstvenih radnika,
- Komisija za citostatike.
- Radna grupa za izradu IPA projekta Prijedloga „Izgradnja kapaciteta, opremanje i dalje jačanje biosigurnosnih uvjeta u mikrobiološkim odjelima u Bosni i Hercegovini“,
- Komisija za popis bezvrijedne registarske građe u Federalnom ministarstvu zdravstva,
- Komisija za popis imovine Federalnog ministarstva zdravstva,
- Komisije za izbor članova upravnih odbora za zdravstvene ustanove gdje je Federacija osnivač, odnosno suosnivač,
- Komisija za izbor državnih službenika.

Naknada za rad članovima komisija se vrši u slučajevima kada se poslovi obavljaju van redovnog radnog vremena.

Naglašavamo da se formiraju i druga radna tijela, gdje nije vršena isplata naknade za rad članovima komisija (komisija za nabavke, komisija za izbor namještenika radi zasnivanja radnog odnosa i sl.).

Na osnovu naknada za rad članovima komisija (neto primanja i zakonom predviđeni porezi za dodatna primanja) ostvareno je, kako slijedi:

<b>Godina</b>	<b>PRIHODI</b>	<b>RASHODI</b>
2006.	1,703.469	317.834
2007.	1,987.215	362.268
I-XI/08	1,774.071	413.176

S poštovanjem,

**MINISTAR**  
  
**Prim. dr Safet Omerović**